

廿一史彈詞註

冊四第

成都楊慎編著
漢陽張三異增定 張仲璜註

廿一史
彈詞註
(四)

中華書局印行

明紀彈詞註

明紀彈詞註卷之上

古往今來歲月。龍爭虎鬪江山。琵琶一曲世千年。瞬息興亡過眼。昨日纔收殘本。今朝重理新編。較前更覺話綿纏。添出許多公案。西江月。詩曰。

十段新詞彈已過。一回含淚一回歌。孤臣寫盡淒涼恨。身後淒涼恨尙多。重理新詞談甚文。故明一代事紛紜。開基聖主知艱苦。蒙業嗣君樂太平。寵任權璫操政柄。縱橫鷹犬擅威靈。九重惟服神仙藥。百爾徒爭門戶名。鍛鍊摧殘元氣喪。飢寒驅逐盜氛橫。村村血濺中原土。處處山堆白骨塵。光祿不能留筆補。東施猶可效心顰。話原通紀分賢否。論采傳書判假真。白叟談來如見慣。黃童聽道是新聞。明朝二百年間事。話到煤山不忍聽。

話說上自盤古。下迄宋元。多少興亡事故。俱打入十段詞中。已資清聽。惟有明朝一代。自洪武至崇禎。歷二百七十八年。君相賢愚。政治得失。不比遠代斷簡殘編。有許多翻新出奇的公案。豈可無詞。致留缺陷。莫奉知音。不揣粗率。少資談論。要皆根據明紀。現在傳書。非憑臆說。敢索是非。高人垂聽。自見分曉。且說明太祖高皇帝。姓朱名元璋。字國瑞。濠州鍾離人。大元至正十五年。四方起兵。太祖以布衣提兵埽蕩。至至正二十七年。即位於金陵。建有天下之號曰明。改元洪武。立子標爲皇太子。至洪武二十五年。太子薨。諡曰懿文。遂立懿文子允炆爲皇太孫。洪武三十一年。太祖崩。太孫即位。是爲

惠宗讓皇帝。

建文
位四年

在爲太祖第四子燕王棣起兵奪位。兵入應天。建文遜去。

燕王即位。是爲

太宗文皇帝。

永樂
在位二十三年
嘉靖中改號成祖

傳子高熾。是爲

仁宗昭皇帝。

洪熙
位一年

在傳子瞻基。是爲

宣宗章皇帝宣德 在位十年傳子祁鎮是爲

英宗睿皇帝正統 在位十四年在北狩弟郕王祁鈺卽位是爲

代宗景皇帝景泰 在位七年羣臣奉

英宗復位天順 在位八年傳子見深是爲

憲宗純皇帝成化 在位二十三年傳子佑橈是爲

孝宗敬皇帝弘治 在位十八年傳子厚煉是爲

武宗毅皇帝正德 在位十六年無嗣迎立憲宗次子興獻王子厚熜卽位是爲

世宗肅皇帝嘉靖 在位四十五年傳子載堉是爲

穆宗莊皇帝隆慶 在位六年傳子翊鈞是爲

神宗顯皇帝萬曆 在位四十八年傳子常洛是爲

光宗貞皇帝泰昌 在位一月傳子由校是爲

熹宗哲皇帝天啓 在位七年無嗣傳弟信王由檢是爲

懷宗端皇帝

崇禎在位十七年

爲流賊擾亂。自經而崩。凡此一十七帝共歷二百七十

八年。今將相傳世代在位短長以及是非治亂。一一寫入詞文。

元之末。立妥懽。太史知亂。

元寧宗崩。太后命迎明宗長子妥懽帖睦爾於廣西。太史院言。妥懽帖睦爾不可立。立則天下亂。太后與大臣定議立之。是爲元順帝。明兵至燕京。走應昌府。又二年崩。

至正間。石人出。偏地紅巾。

元順帝至正十一年。命賈魯充河防使。開復黃河故道。先是河南北童謠云。石人一隻眼。挑動黃河天下反。及魯治河。果於黃陵岡得石人一眼。而汝潁之兵起。樂城人韓山童。以白蓮會倡亂。愚民翕然信之。潁川劉福通。羅田徐壽輝等。皆共起兵。以紅巾爲號。又註見第十段元史偏地紅巾句下。

裂土字。盜名號。一王四帝。

通紀曰。是時盜賊蜂起。割裂土宇。潁川劉福通。立韓林兒爲帝。號小明王。國號宋。徐壽輝據蘄州爲帝。國號天完。吳張士誠稱吳王。西漢陳友諒稱帝於江州。明玉珍稱帝於隴蜀。錢氏曰。元政不綱。紅巾騷動。一時盜有名字者。四帝一王。皆志在子女玉帛。非有撥亂救時之心也。明太祖諭元納哈出書曰。四帝一王。皆爲俘馘。此天命。非人力也。

異雲起。天子氣。應運龍興。

元至正初。青田劉基舉進士。累官浙江儒學副提舉。常建議勦方國珍。不用。安置紹興。遊西湖。有異雲起西北。諸同遊者皆以爲慶雲。將分韻賦詩。基獨縱飲不顧。大言曰。此天子氣也。

應在金陵。十年後有者王興。我當輔之。李良翰曰。元運氣絕。天必簡一聖人出而鍾冶乾坤。惟時太祖高皇應運而興。

明太祖起淮右卜筮倡義

明太祖姓朱名元璋。後即位。建國號曰明。建元洪武。是爲太祖高皇帝。其先沛人。徙江東句容。爲朱家巷。宋季再徙淮家泗州。父又徙鍾離太平鄉。太祖年十七。泗大疫。父母兄及幼弟俱死。孤立無依。入皇覺寺爲僧。後四方兵起。定遠人郭子興。攻據濠州。元將徹里不花。憚不敢進。日掠良民邀賞。太祖欲入濠避兵。請伽藍卜筮問避亂。不吉。問守故。不吉。因祝曰。豈欲予入濠倡義耶。乞許陰。遂往。後太祖詔中有曰。朕本淮右布衣。肇興丕基。玆音教。

投子興居甥館志切安民

太祖入濠。門者疑爲謀。執見子興。子興奇其狀貌。與語大悅。收爲親兵。凡有攻伐。命之往輒勝。子興故撫宿州馬公女爲己女。遂妻焉。卽高后也。軍中呼爲朱公子。太祖在甥館。慨然有救天下安民生之志。後子興稱滁陽王。尋卒。太祖統其軍。

辭左帥下滁和招延豪傑

時劉福通立韓林兒爲宋帝。改元龍鳳。遣人檄子興爲元帥。張天祐右副元帥。太祖左副元帥。太祖曰。大丈夫寧能受制於人耶。不受。初太祖糾合義旅。由濠狗定遠。進攻滁陽。花雲爲先鋒。單騎衝賊陣而過。敵大驚曰。此黑將軍勇甚。不可與爭鋒。遂克滁陽。會滁師乏糧。謀取和陽。元平章也先帖木兒急閉門。以飛橋縋兵出戰。張天祐擊敗之。追至小西門。湯和奪其橋而登。遂據和陽。太祖旣總和陽兵。威名益著。先館甥在濠。卽延攬英雄。有若飢渴。故豪傑景從。徐達湯和等數十人率先歸附。後並爲開國元勳。

賽豐沛比南陽天產濠英

陳建曰：昔漢高功臣，多起豐沛。光武名將，半出南陽。明初功臣，強半濠州。蓋天生真主，必多產英才，以備驅策，豈偶然哉？

李善長以蕭何運籌轉餉

定遠人李善長，少有智計。太祖略滁陽，善長被書生服道謁。太祖問知爲里中長者，命掌簿書，贊計畫。凡師行，必留守轉調兵餉。時大將軍等定中原，平僭僞，善長居中，雍容無所見績。太祖獨知之，詰辭曰：東征西伐，日不暇給，爾獨守國，轉運糧儲，供給器仗，漢有蕭何，未爾過也。後爲太師丞相，爵韓國公。大將軍徐達爲元功，位猶在善長下。

劉伯溫方諸葛帷幄謀深

劉基，字伯溫，青田人。少聰穎絕羣。通天文陰符家言，揭傒斯見而奇之，曰：子魏元成流也。西蜀趙元澤復奇之，曰：公乃受魏元成目耶。非諸葛武侯，未易當也。太祖下金華，定括蒼，基指乾象謂所親曰：此天授，非人力也。會總制官孫炎奉命來聘，遂趨金陵。陳時務十八策，太祖大悅，獨留帷幄，預機密謀議，定征討大計。太祖時時謂人曰：伯溫，吾子房也。爵誠意伯。劉基諡文成。

風雲會汗馬功六王稱首

太祖濠城之起，一時風雲聚會，豪傑翕從。凡二十四將，人如某布，地皆錯壤。然開國功臣，汗馬著烈，以六王爲首。濠人徐達，從太祖最先，摧堅撫順，將略不下韓信。明有天下，達之力居多。爵魏國公，封中山王。諡武寧。定遠人常遇春，初從盜魁劉聚，察其無遠志，棄之來歸。請爲先鋒，從太祖平陳友諒，同大將軍徐達定山東，下河南，百戰百勝，於諸將中最勇。封開平王。

諡忠武。盱眙人李文忠，太祖姊子也。年十二而母卒，父貞攜文忠投滁陽，後以舍人從軍。破陳友諒，驍勇爲諸軍冠。所在有功，與大將軍分道北討，破應昌，獲元孫質的里八剌。太祖令參軍國大計與達等，爵曹國公，封岐陽王。諡武靖，定遠人沐英，父母雙亡，太祖收爲子，從下福建，擒平章陳友定，歸其姓沐，特受心膂托，同傳友德下雲南，諸郡悉平，詔英留鎮，爵西平侯。封黔寧王。諡昭靖，虹縣人鄧愈，歸附滁陽，太祖授爲管軍總管，從渡江，克采石，取太平，破元兵，殲友諒，殲土誠，降胡廷瑞，戰功居多，從大將軍出隴右，大破王保保於定西，爵衛國公，封寧河王。諡武順，潯人湯和，初從滁陽王，太祖請之與和共事，守常州，拒土誠，其後破川陝，定雲貴，多立戰功，爵中山侯，復進信國公，封東甌王。諡襄武。徐達，字天德，遇春，字伯仁，文忠，字思本，乳名保保，鄧愈，字伯顏，湯和，字鼎臣。

傳友德馮國勝屢建奇勳

宿州人傳友德，初從陳友諒。太祖攻江州，友德曰：「此吾主也。」以所部謁見於小孤山，擢爲將，從遇春擊友諒，功最多。嗣南征北討，建立殊勳。爵穎國公。陳建曰：「太祖功臣，首稱六王，然以傳穎公較之，猶在寧河東甌之上。當與開平岐陽比肩。」定遠人馮國勝，與兄國用，皆驍勇有智略。太祖略地至妙山，弟兄來謁，遂置左右，預機密。國用病卒，國勝歷官右都督，從大將軍北征，克汴梁，平全陝，又破王保保，破吐蕃，出鎮陝西，定甘肅，破哈納出，屢著戰功，佐成一統。爵宋國公。馮勝，初名國勝，更名宗異，最後名勝。

巢湖傑濟舟師三禽二廖

太祖駐和陽，久謀渡江取金陵，患無舟楫。時巢縣人廖永安、永忠、俞廷玉與子通海通源通淵等，俱膂力過衆，各泊舟巢湖，連結水砦以扞寇。會妖黨左君弼據廬州，永安等爲所扼，乃間道納款。太祖親至巢湖，引永安等歸。會元中丞蠻子海牙集樓船阻馬場河口，太祖歸和陽，集商人舟率師攻之。永安等以小舟往來如飛，奮擊大敗之，乃得入大江。從歸和陽，遂定渡江之計。

後爵永忠德慶侯。俞通源南安侯。追封俞通海。號國公。永安等先俱陣歿。

吳良禎免東顧保障江陰

濠人吳良。太祖以爲江陰守將。江陰密邇士誠。僅百餘里。控扼大江。實當東南要衝。又命其弟禎增兵協鎮。士誠寇江陰。良命弟禎以十餘騎蹂之。擒其卒數人。餘黨不敢前。欲攻東門。良遣元帥王子明馳擊之。擒其將士五百人。敵大敗宵遁。時賊屢侵常州。良禎守禦有方。不敢犯境。太祖召見。勞之曰。吳院判保障一方。使吾無東顧憂。其功大矣。賜車馬珠玉不足旌。命諸儒臣爲詩文美之。良在江陰十年。訓飭將校。興學修屯。太祖有事江漢。東藩無擾。皆良禎爲之捍蔽也。吳良。本名國興。賜名良。封江陰侯。贈江國公。諡襄烈。弟禎。本名國寶。封靖海侯。贈海國公。諡襄毅。

首殉難垂大節胡韓花許

虹縣人胡大海。智力絕倫。太祖用爲前鋒。所向戰必勝。攻必取。及太祖下婺州。命大海爲守將。金華苗帥蔣英作亂。英陽請大海至八詠樓下觀弩。大海出。將上馬。英令其黨鍾矮子詭訴曰。蔣英欲殺我。大海反顧英。英袖出鐵鎚。若擊矮子狀。因中海海腦仆地。英即斷其首。太祖與陳友諒戰於康郎。友諒驍將張定邊奮前犯太祖舟。舟膠於沙。漢兵匝焉。牙將韓成進曰。古語人殺身以成仁。臣不敢愛其死。乃服上冠袍。對敵自投水中。敵信之。攻少緩。俞通海來援。舟驟進水湧。太祖舟始脫。太祖下太平。以花雲爲守將。友諒率舟師犯太平。圍其城。雲迎戰。三日不得入。友諒以巨舟乘漲。舟尾高與城平。士卒緣之上。城遂陷。賊縛雲急。雲奮躍大呼起。縛盡絕。奪刀殺五六人。賊縛雲舟檣叢射之。比死。罵不絕口。樂平儒士許瑗。謁太祖於寧越。太祖喜。以太平爲股肱郡。命瑗爲知府。至是友諒陷太平。瑗抗節不屈。死之。捷錄云。胡韓花許。節垂百世。婺。音務。大海贈越國公。諡昌莊。韓成追封高成侯。

屈先生禮賢館望重陶秦。

青田劉基。浦江宋濂。麗水葉琛。龍泉章溢。胡大海。薦四賢人。以書幣徵至。入見。太祖喜曰。我爲天下。屈四先生。咨以時事。甚見尊禮。命創禮賢館處之。太祖下太平。耆儒陶安。李習。率士民出迎。安見太祖。謂習曰。我輩今有主矣。後官翰林。賜一聯曰。國家謀略無雙士。翰苑文章第一家。洛陽人秦從龍。避亂居鎮江。太祖命徐達。詢訪聘至。親至龍江迎入。事無大小皆與謀。從龍盡言無隱。每以筆書漆簡。問答甚密。左右無知之者。太祖呼爲先生而不名。捷錄曰。陶秦章葉。望冠一時。宋濂。字景濂。追諡文憲。葉琛。字景淵。章溢。字三益。陶安。字主敬。當塗人。贈姑熟郡公。從龍。字元之。

將如雨。臣如雲。同心戮力。

李良翰曰。其間攀龍鱗。附鳳翼。以翺天啓運者。如雲如雨。相與戮力協贊。定鼎於龍蟠虎踞之都。然後東征西討。

下太平。拔采石。定鼎金陵。

太祖率諸將渡江。先抵采石磯。時元兵陣於磯上。舟距岸三丈許。未能卒登。常遇春飛舸至。太祖麾之。應聲挺戈躍而上。守者披靡。諸軍從之。遂拔采石。乘勝徑攻太平。元守臣棄城遁。遂下太平。旋進取金陵。馮國用敗元兵於蔣山。直抵城下。諸軍拔柵競進。元南臺御史大夫福壽戰死。蠻子海牙遁歸。康茂才率衆降。遂克金陵。太祖入城。召吏民諭之曰。吾率衆至此。爲民除害耳。軍民更相慶慰。初。馮國用來謁。太祖問定天下大計。國用曰。金陵龍蟠虎踞。真帝王都。願先拔金陵而定鼎。然後掃除羣寇。天下不難平也。太祖改爲應天府。遂定都焉。

黃雲覆。襄城橋。堃先擒縱。

太祖初下太平。元義兵元帥陳瑱先水陸分道來攻。太祖親督兵禦之。命徐達鄧愈以奇兵出其後。設伏於襄城橋。瑱先至。見有黃雲罩於城上。遂驚敗。爲伏兵所擒。太祖釋不殺。語之曰。人各有心。從元從我。不相強也。縱之還。收餘衆屯板橋。太祖取金陵。瑱先與福壽合拒戰於秦淮水上。爲鄉民兵百戶盧德茂謀殺之。其子兆先。復集兵屯方山。蠻子海牙結寨采石。圖犄角攻太平。常遇春攻海牙。大破之。進攻兆先。營擒兆先。復釋而用之。俾爲元帥從征。

呼老康敗友諒預料驕輕

陳友諒。沔陽漁家子。本姓謝。先世贅於陳。冒陳姓。從徐壽輝。領兵爲元帥。自稱天完平章。尋稱漢王。及攻下太平。於采石舟中弑壽輝。以采石五通廟爲行殿。稱皇帝。國號漢。改元大義。遣使約張士誠同入寇。引兵東下。建康大震。太祖恐二寇合。欲速友諒先來。知指揮康茂才與友諒舊。命作書約爲內應。招之。茂才遣舊事友諒之老閹者賁書往。友諒喜。問康公今何在。曰。守江東橋。問何橋。曰。木橋也。乃遣還。曰。歸語康公。吾卽至。呼老康爲號。閹者歸以告。太祖易橋以鐵石。嚴兵以待。友諒果是日徑衝江東橋。見皆鐵石。連呼老康。不應。知墮計。率兵向龍江。先遣萬人登岸立柵。伏兵起。大敗之。友諒軍潰趨舟。值潮退。舟膠淺。殺溺無算。友諒乘別舸脫走。太祖遂決計先伐友諒。帥舟師溯流而上。直擣江州。友諒倉卒不能軍。挈妻子夜奔武昌。遂入江州。乘勝追拔。斬黃興廣等處。遣使招諭江西。諸郡皆降。後太祖語徐達曰。朕初與二寇相持。或勸朕先擊士誠。以士誠切近。友諒稍遠。若先擊友諒。則士誠必乘我後。然不知友諒驕而輕。士誠狡而懦。故朕先攻友諒。知士誠必不能越姑蘇一步。若先士誠。友諒必空國而來。我疲於應敵矣。朕取二寇。固有先後耳。茂才。蘄州人。追封蘄國公。

康郎戰鐵冠賀盪平西漢

太祖既定江西。友諒忿其疆場日蹙。大作高艦。乘張薄南昌城下。明都督朱文正等分門死守。遣千戶張子明赴建康告急。友諒圍八十五日。太祖督舟師來援。進次湖口。始解圍。東出鄱陽。

迎戰。遇於康郎山。友諒鎖巨舟爲陣。郭興曰：「非火攻不可。」乃乘風縱火。焚其水寨數百艘。湖水盡赤。友諒弟友仁、友貴皆焚死。友諒欲退保鞋山。我軍橫截湖面。不得出。俞通海以湖水淺。請移舟扼江上流。太祖移舟列柵江南北岸。置火舟火筏。中流戒嚴以俟。友諒計窮。冒死突出。繞江下流。欲由禁江遁回。諸軍追擊數十里不解。是時臨川人張中所謂鐵冠道人者。亦在師中。忽大笑賀曰：「友諒死矣。」太祖曰：「無妄言。」縛汝水濱以俟。乃遣人具牲酒往祭。旋有降卒來奔。言友諒在別舸中流矢貫睛。及顛而死。其將張定邊以小舟夜載屍及子理奔武昌。復立理爲帝。次年太祖至武昌圍之。傅友德先登。奪城東高冠山。俯瞰城中。常遇春擒岳州來援守將張必先。必先驍勇。漢倫爲重。縛示城下。又遣友諒舊臣羅復仁諭降。理遂率定邊等詣軍門降。封理爲歸德侯。西漢遂亡。張中。字景華。

滅東吳。俘九四。薪積齊雲。

張士誠。白駒場亭民。爲鹽場牙儉。行九四。與弟士德士信。同其黨李伯昇潘原明呂珍等十八人。陷高郵。旋據浙西姑蘇諸郡。南至紹興。與方國珍接壤。北跨淮海。與山東相距。遂僭稱王。國號曰吳。太祖議討之。命徐達等先取通泰諸郡。剪其羽翼。及兩淮既平。遂專事浙西。副將軍常遇春。請直搗姑蘇。太祖令先攻湖州。使其疲於奔命。進次湖州之三里橋。士誠右丞張天驕分兵三路迎戰。皆敗。士誠遣李伯昇來援。潛入城被圍。又遣呂珍及其五太子來屯城東之舊館。達等連破援兵。焚其赤龍船。呂珍等以舊館降。達以珍狗於湖州城下。天驕伯昇亦以湖州降。吳平章潘原明懼。亦以杭州降。遂進逼姑蘇。戰於南鮎魚口。敗之。又敗之於尹山橋。遂進圍城。士誠被圍久。欲突圍出。至盤門。遇春大敗之。士誠馬驚墮水。幾不救。肩輿入城。又突出奮門。遇春禦之。復敗。自是不敢出。達督將士破葑門。遇春破閶門。城中不支。投兵降。士誠率兵戰於萬壽寺東街。復敗歸。謂其妻劉氏曰：「我敗且死。若曹何爲？」劉氏曰：「妾必不負君。」予乳媪金。抱二幼子出。積薪齊雲樓下。驅其妻妾侍女登樓。縱火焚之。劉氏自縊死。達遣伯昇諭意。時日已暮。士誠距戶經。伯昇決戶抱解。復蘇。曰：「九四英雄。患無身耳。瞑目不言。乃以舊

盾昇至舟中。不食。至龍江。臥不肯起。昇至中書省。言不遜。李善長罵之。士誠自縊死。

由海道降國珍。悉收甌越。

黃巖人方國珍。於元至正八年。劫掠沿海州縣。尋據溫台慶元等路。太祖下婺州。遣使紹諭。國珍以次子爲質。太祖厚賜而遣之。國珍復納溫台慶元三郡籍。雖來獻而未納土。復遣使往諭。云俟克杭州納土。太祖命參政朱亮祖討之。克台州。黃巖降。進克溫州。太祖又命湯和爲征南將軍。進兵慶元。亦降。國珍乘海舟遁。太祖復命廖永忠爲征南副將軍。率師由海道會湯和等討之。國珍率家來降。遣次子奉表謝罪。國珍至京師。後授廣西行省左丞。奉朝請。善終。亮祖。六合人。

綏中原。先閩廣。廟算如神。

福清人陳友定。以明溪驛卒談軍事。元汀州判蔡公安奇之。授以巡檢。從討山賊有功。累遷左丞。開省於汀州。尋命爲福建行省平章政事。兼守八閩。至是太祖命胡廷美取福建。師度杉關。攻邵武建陽。降之。太祖又命湯和等由海道取福州。和與廖永忠自明州乘東北風。不數日奄至城下。克之。進兵延平。先遣人招諭友定。友定殺使者。誓以死報元。圍十日。城將破。友定坐省堂。按劍仰藥。飲盡。兵入城。與友定出。俄大雷雨。復蘇。械父子送京。太祖面詰之。恚曰。已矣。毋多談。安得加我死乎。遂棄市。漳泉等郡皆降。閩地悉平。東莞人何真。常爲淡水場管勾。元末。嶺南盜起。真結豪民保障。值南海寇陷廣州。真擊走之。元立江西分省於廣東。以真爲參政。又陞右丞。遂據有廣東諸郡。至是太祖命廖永忠朱亮祖由海道取廣東。諭以廣東平。即合兵取廣西。更命楊瑄等率武昌荊州等衛軍由湖廣取廣西。諭之曰。南方皆入版圖。惟淮北山東未一。兩廣八閩未附。已命丞相徐達北定中原。胡廷美分道八閩。俟八閩既定。就以其師進取廣東。故命爾等進取廣西。兩軍合勢。何征不克。又敕陸仲亨率師由韶州直趨德慶。於是永忠駐福州。先遣人以書諭真。及永忠至潮州。真奉表歸附。遂入廣州。各郡俱降。真入朝賜宴。

授江西行省中書參知政事。永忠等進兵梧州。璟等克永州。引兵抵靖江城下。亮祖亦自廣東來會。屯於象鼻山下。相持兩月。攻圍益力。城中人無鬪志。約四鼓入城。也兒吉尼走伏波門。執之。南寧州郡所在皆降。廣西悉平。谷應泰曰。徐達一軍。由淮入河。乃太祖不并力中原。而分兵南徼。先事蠻方。緩急之數。得毋出下策乎。不知江南之地。漢吳閩三方並沒。粵服先聲。即可傳檄而定。所以兵不血刃。而拱手得之者。則太祖之廟算長也。

撤屏蔽。斷羽翼。先平齊豫。

太祖謂徐達曰。中原擾攘。今欲北伐。計將何如。遇春曰。直擣元都。餘皆建瓴下矣。太祖曰。元建都百年。懸師深入。頓於堅城。餽餉不繼。非我利也。吾欲先取山東。撤其屏蔽。旋師河南。斷其羽翼。按潼關而守之。據其戶檻。然後加兵元都。則勢孤援絕。不戰可克。既克其都。鼓行而西。雲中太原以及關隴。可席捲而下。諸將曰善。乃以達與遇春由淮入河。長驅北伐。達至淮安。以書諭元義兵都元帥王宣及子信。宣納款復叛。達急攻沂州。宣復降。戮之。青州東平濟南等處皆下。元守臣或遁或降。山東郡縣悉平。達引兵上黃河。克歸德許州。取汴梁。元守臣李景昌遁。時左君弼守陳州。太祖諭以書。且歸其母。君弼感泣。詣達降。進攻河南府。元平章梁王阿魯溫降。進克陝州。直抵潼關。李思齊部將張德欽拒戰。敗之。遂入潼關。

定幽燕。不血刃。元主宵奔。

太祖以潼關東皆平。命諸將進取元都。達等自中灤渡河。取衛輝彰德廣平等府。進克臨清。諸將俱以師會。於是遇春率舟師並河東西以進。步騎遵陸而前。元丞相也速捍禦海口。望風奔潰。至河西務。平章俺普等迎敵。大敗。至通州。元將五十八國公拒戰。指揮郭英伏兵敗之。遂入通州。元主大懼。集后妃太子同議北行。元主徘徊太息曰。今日豈可復作徽欽。左丞相失烈門勸固守京城。不聽。命淮王帖木兒不花監國。丞相慶童留守。是夜三鼓。開建德門如上都。達等進克燕京。

敗擴廓降思齊掃清秦晉

元平章擴廓帖木兒，察罕帖木兒甥，王保保也。察罕養爲己子。察罕死，擴廓領父兵，封河南王，據太原。順帝北走，命擴廓率兵出雁門關，由保安州經居庸以攻北平。徐達聞之，謂諸將曰：王保保率師遠出，太原必虛，我乘其不備，直抵太原，傾其巢穴。若彼還救，必成擒矣。引兵徑進，擴廓至保安州聞之，果還軍。達等乘夜襲之，擴廓聞變，亟納靴，跳一足，踰帳後出，從十八騎遁去。遂克太原。達復遣傅友德、遜擊賀宗哲於石州，敗之。崞忻靈絳猗氏平陽等處皆平。諸軍攻大同路，克之。進克河中府。達等遂會諸將，進取陝西，造浮橋渡河，攻西安府，降之。時李思齊自潼關奔鳳翔，達遣馮勝取之。思齊奔臨洮，遂進克隴州秦州鞏昌。復遣勝征臨洮，思齊窮迫，舉城降。時張思道弟良臣守慶陽，亦降。會達征平涼，良臣復叛，達遣兵圍之。其黨姚暉等獻門納師，達入城，執良臣斬之。慶陽平。遂下平涼。王保保賀宗哲北遁，陝西悉平。達等班師還京。

保保亡納哈執買的俘擒

王保保知達軍南還，自甘肅以兵來襲蘭州。太祖議征沙漠，命達由陝西征王保保。李文忠出北平攻元上都，達大破王保保兵於定西古城。保保從古城走和林。元嗣主復任以政，從徙金山之北。至洪武八年卒於合剌那海之衙庭。妻毛氏亦自縊。太祖曰：我竟無以臣王保保，眞男子也。文忠等師出野狐嶺，擒元平章祝眞，進敗太尉蠻子於駱駝山，遂次開平。獲元平章上都罕知，庚申君已丑。文忠兼程至應昌，克其城，獲元主孫買的里八剌，並后妃諸王。及宋代玉璽金寶等物。元太子愛猷理達臘僅脫身遁。朔庭遂空。元太尉納哈出據金山，數寇擾遼東。太祖命宋國公馮勝、穎國公傅友德率師三十萬征之。復遣前所獲納哈出都將乃剌吾隨往諷降。勝等趨金山，乃剌吾還至松花河，納哈出見之，大驚，相勞問。乃剌吾告以朝廷遣還之意。初，納哈出分兵爲三營，人畜輜重過於元主，至是計窮，乃剌吾勸之降。遂遣使納款。勝遣藍玉往一禿河受之，使還報。納哈出指天噴噴曰：天不復與我有此衆矣。遂詣王降。玉與飲甚歡。納哈出酌酒

爵王。玉解衣衣之。曰。請服此而後飲。納哈出不肯服。取酒澆地。鄉國公常茂在坐。直前搏之。納哈出驚起就馬。茂拔刀欲之。傷臂不得去。耿忠以衆擁之見勝。勝令耿忠與同寢食。班師至京。封納哈出爲海西侯。

惠儲順脫古弒元裔遁跡。

淮安侯華雲龍。統兵至雲州。擒元平章僧家奴。進至上都大石崖。敗驢兒國公於高州武平。遣指揮孫恭招諭元惠王伯都。不花。儲王伯顏。不花等皆降。送惠儲至京。賜第宅。襲衣什器。月給錢米。元太子愛猷識理達臘在位十一年。殂。次子益王脫古思帖木兒立。九年。藍玉北征。脫古走至也速迭兒之地。爲部下所弒。僚屬奔散。不能自立。所謂小王子。卽元裔也。

定滇南平僞夏一統乾坤。

隨州人明玉珍。以信義爲鄉黨所服。徐壽輝兵起。集鄉兵結柵自固。尋降壽輝。授元帥。鎮沔陽。至正十四年。以兵千人。船五十。溯夔而上。攻元右丞相完者都於重慶。克其城。下嘉定。據成都。稱羅蜀王。二十二年。僭稱帝。國號大夏。改元天統。玉珍尋卒。子昇嗣。年十歲。改元開熙。至是關陝既定。太祖命中山侯湯和同廖永忠等率京衛荆湘舟師。由瞿塘趨重慶。潁川侯傅友德率河南陝西步騎。由秦隴趨成都。分道並進。友德覘知階文守備單弱。乃攀援山谷。連戰克階文。綿漢四州。適江漲。以木牌數千。書克諸州日月。投漢江。順流而下。蜀守者解體。時和等以暴漲不得進。會得木牌。永忠先破其陸寨。從上流揚旗鼓譟而下。遂入夔州。乘勝抵重慶。沿江州縣。望風奔附。昇大懼。遣使詣永忠納款。及和至。昇面縛銜璧。奉表詣軍門降。友德旋克成都。蜀地悉平。昇至京。封歸義侯。時天下大定。惟元梁王把匝剌瓦爾密尙據滇南未服。太祖遣詔使王禕招諭被殺。乃命友德爲征南將軍。藍玉沐英爲副討之。由辰沅趨貴州。至普安。攻下之。進至曲靖。元梁王遣其司徒平章達里麻屯曲靖以拒。沐英倍道進師。衝霧行。至白石江。霧霽。兩軍相望。達里麻驚爲神兵。英分遣一軍沂流渡出陣後。友德濟江進戰。敵陣亂披。